



San 19nan Utikalo - san 1991
A songo : DOROME 10 - N° 235


Kibaru

A be bo kalo o kalo "AMAP" ka yamaruya kono - Hake : 16.000
"AMAP" kuntigi : Gawusu DARABO - Dilanbagaw kuntigi: Amadu GAÏI Kante - Sebenbagaw kuntigi: Basiriki TURE


Konferansi Nasional

fasojamakuluw ka kunben kene

Mali jamana
te se ka bila
mogo kelen
ka bolo kan
tugun !



forobafanga



Mali cikelaw
kumada dayelenna
(a be ne 3 la)

forobafanga

Mali te se
ka bila
mogo kelen
ka bolo kan
tugun !



Ajrala «KIBARU» n° 234 konon min bora san 1991 Zuluyekalo la, ko pariti politiki camanko min ma sira soro mall kono, k'o de kera Musa Tarawele n'a ka fanga binni sababu ye. Musa bankun tun be pariti camanko ma, bawo, a tun t'a fe pariti werew n'a le ka pariti UDPM ka je Mali togolakow la, jamana kono, an'a kokan. San 23 in kono, fanga diyara Musa kunfe, k'a bonya a yere bolo, cogoya la, min y'a fili a yere ma. A tun dalen b'a yere la cogo min na, a tun t'a faamuya, a tun te son, ka fanga bila bolo caman kan, bawo, fanga nafaw tilayoro tun be caya. An be waati min na sisan, o ye yelema waati ye. Bee ne yelenna. Bee ye faamuyali ke. Bee y'a don, ko farajela ani farafinna, fanga te se, tugun, ka bila mogo kelen ka bolo kan. O siratige la, Mali kono, kelew anitijeliw ni kasaara cejuguw kera, wala ka «yerfanga» ke «forobafanga» ye. Jekulu minnu jera ka


Musa ka fanga bin, k'a yere n'a furumuso n'u nokanmogow bee mine, olu ye fasojamakulu do sigi senkan. Jekulu fen o fen ye Musa n'a ka mogow kele, san 1991 kalo saba folo furance la, siviliw ani sorodasiw, olu jera ka jekulu do sigi senkan, n'o ye «CTSP» ye, min nemogo ye Amadou Tumani TURE - ATT - ye, n'a le bilala jamana kuntigya la, sanni forobafanga ka nemogo kuraw sigi, sariya kuraw kadara kono. Nk'a ajrala ko sanni sariya kuraw ka ta, ka jamana boloda kokura ye, ko bee be se k'ika pariti politiki sigi senkan. O de koson sariya tara, n'o ye Ordona N° 2/CTSP ye, san 1991 Awirilikalo la, min be Malidenw yamaruya pariti politikisigiw la, jamana kono an'a kokan. K'a ta Awirilikalo la, a sariya jensemuma, fo ka se Utikalo in ma, n'o beben kalo 5 hake ma, pariti politiki 42 jogon de sigira sen kan Mall Jamana kono. A paritiw n'u nemogow file.

- 1- UDF : Metiri Dénba JALO - Ngolonina - Bamako
- 2-CNID : Metiri Muntaga TALI-Narela - Bamako
- 3- RDP : Alimani SILA - Bamako
- 4-PDJ : Dr Abudulu BA-Sokoroji - Mananbugu - Bamako
- 5- PDP : Bakary Sori JARA - Bamako
- 6- UDD: Musa Bala KULUBALI - Bamako
- 7- RTM : Abudulayi NAKO - Sikasso
- 8-US-RDA : Dr Mamadu GOLOGO - Kenzanbugu - Bamako
- 9-PUPM : Nori Agi ATIYA - Tumutu
- 10-PEI : Ibrahima TARAWELE - Kenzanbugu - Bamako
- 11- UFODP : Koloneli Yusufu TARAWELE - Jikoroni - Bamako
- 12- PRDT : Musa Céfolo TARAWELE - Wolofobugu - Bamako
- 13-PMPS : Fayinke TIBU - Darisalamu - Bamako
- 14-PLM : Bala DUKURE - Bamako
- 15-PSP : Bugadari KULUBALI - Medina-Kura - Bamako
- 16-RJP : Kadi DARAME - Lafiabugu -

- Bamako
- 17- PPS : Abudulayi KANUTE - Lafiabugu - Bamako
- 18- UPR : Sheki Amadu JONO - SEMA Falaje - Bamako
- 19- SPR : Jaje DAJOKO - SEMA Falaje - Bamako
- 20- PTR : Maliki Aba GISE - Dawudabugu - Bamako
- 21- PSDM : Sheki Hamala BARAJI - Dawudabugu - Bamako
- 22- PLD : Cemoko Musa JAKITE - Lafiabugu - Bamako
- 23- UNDP : Adama TARAWOLE - Bamako
- 24- RDT : Amadu Ali JAGADO - Bamako
- 25-SDUT : Abudulayi Buru SISE - Hamudalayi - Bamako
- 26-RUP : Laji Usmane JAWARA - «SEMA II - GEXCO» - Bamako
- 27-PSD : Umaru SISOKO - Jelibugu - Bamako
- 28-UMADD : Seydou SULEYI - Menaka
- 29-PSM : Mahamadu Fili SISOKO - Darisalamu - Bamako

- 30- PMD : Adama SANOGO - Hamudalayi - Bamako
- 31- PMP : Modibo BADO - Lafiabugu - Bamako
- 32- RPDI : Beni Bubakari Eli HABIBU - Medina-Kura - Bamako
- 33- ADEMA : Alifa Umaru KONARE - Bamakokura - Bamako
- 34- MPLA : Isa JARA - Korofinna-Bamako
- 35- PDD : Bakari TOGOLA - Sikasso
- 36- FPM : Mamadu Papa SIDIBE - Bamako
- 37- MPDRUAO : Bubu SALI - Wolofobugu - Bolibana - Bamako
- 38- UDS : Dr Atayeri TURE - Kayi - Liberite
- 39- PSRMPC : Sheki Abudeli kaderi DUNBIYA - Kalabankoro - Bamako
- 40- RRPM : Pariti yamaruyara sariya fe. Nk'a adereri ma soro
- 41- CDDNL : Nama Sori Ibrahima SISOKO - Ntomikorobugu - Bamako
- 42- RPR : Masire KULUBALI - Mananbugu - Bamako.

Mali Konferansi Nasionali kera ATT kunnawoloko ye Afiriki ani dine kono



Amadou Tumani TURE n'a bë wele ATT Mali Jamana Fangaso Kuntigi ni CTSP Peresidan

Mali Konferansi Nasionali

fasojamakuluw ka kunben kene

Hakililajigin siratige la, san 1991, marisikalo tile 26 ye don ye, malidenw bë mën ka min lakali, bawo a bë fo ko «koba nàfamaw te ke ka caya, nka a mana këko kelen min ke, an bë mën k'o lakali».

O de sababu la, san 23 fanga jugu miñ tun bë ka boli malidenw kan, Musa Tarawele n'a ka denbaya n'a nɔfemogòw fe, o fanga jugu n'a kasaaraw wulila ka lafiya di fasojama ma san 1991, marisikalo tile 26. O se soroju bora jònw na? Lakoldenw ni kalandenkorobaw, minnu caman bɔnəna u ni na Musa ka fanga sinsinnaw fe ni mugu ni kise ye, k'a soro u tun bë Mali ka jetaa ni kelenya dɔrɔn de nɔfe.

O ju bora jònw na? Pariti politikiw Musa m'a ka yamaruya di minnu ma, n'o tɔndenw tun hamit te fén wère ye, malidenw ka hère ni ben ni kelenya ninini ko.

O ju bora jònw na? An balimamuso

minnu y'u kunda Musa Tarawele ka «pale» kan kuluba, n'u kumbenna ni «wuruwèrenin» ni «gerenadi» ni «tankiw» ye Bala lakanani sɔrɔdasiw fe.

O se ju bora jònw na? Foroba jekuluw ni kεnεreyew ni hadamadenya ni-dungo sariyaw lafasabaga jekulu ni Mali baarakelaw ka kelenya tonba ni mògo yeleke wèrew.

Nka, an bë se ka min fo, n'o jelen don i ko perekali, o ye fasojama fanba jònnyebini jamanadenw kabonogola ni ben ni nɔgɔnkanu ye.


Jekulu kofolen ninnu faralen Mali hakilijumantigi tòw kan, an bë min don an'an te min don, Mali kono an'a kokan, ninnu bëe lajelen haminankow waleyara san 1991, marisikalo tile 26, sɔrɔdasi jalatigi dòw fe, minnu nɔmogoya tun bë Liyetenan Amadou Tumani TURE bolo.

Jalatigi ninnu y'u sigi k'u hakilijakabo, k'a ye ko «Zeneral» Musa Tarawele

filil'a yere ma. An faw n'an baw, an musow n'an dënw, olu minnu ka nisɔngø donna mugu ni kise sanni dafé, walasa ka malidenw lakana sokon juguw ni kókan juguw töoro ma, Musa Tarawele n'a ka naamiw y'o mugu ni kise nesin fasodenw ma, k'a soro u m'a min, u m'a bón. Musa ka san 23 fanga in kono, a yere n'a muso somogòw ni politiki fangakow nɔmogobaw, siwili kunda ani sɔrɔdasi kunda, u bëe ye nafoloni fisaya ni fasobaara ye. A wáati, donda suguya bëe tun bë nafolo la fo jamana kunkoda. Musa Tarawele tile kera dantemenko ye. A m'a don k'a te ko kunna fo san 1991, marisikalo tile 26. Jama murutira. Baarakelaw ye baara bila, naniyajiraw cayara. Musa delila cogoya sugubëe la a ka je fanga kó, nk'a ma son. A ko malidenw nɔgon jitò te, u nɔgon siranbaato te. O

(a to bë n'e 4 la)

Mali Konferansi Nasionali



tuma, n'u m'u sigi yoro kelen, a bë jahanama takise jigin u kan. O yoro la, n b'aw hakili da, malidenwwolokanwunafonisebenw bëbagakuntigi Amadu Gani Kante ka fota dō kan, mekalo temenni kibaru kono. A y'a jira ko:
Maliden te siran. A bë taasi de.
Maliden te funun. A bë sabali de.
Maliden te boli. A b'a kofile de.
Nka n'i ye maliden diminen ye, fo ka se murutili hakema, kana nininkali ke: o ye dantemenco ye».
 An bëe b'a dòn ko ce man ni ce bolo.

O misali surun file aw koro: san 1991 marisikalo tile 26, sorodasi, jalatigi minnu hamina fanga forobayali la, k'a dòn ko politikiko tun be cogo be min na «UDPM» tile la, n'o ye mögo kelen ka diyagoya fanga sinsinny ye fasojama fanba kan, k'o tile banna; o jalatigiw de ye Musa Tarawele kuda jabi la, k'a bolo d'a ko, k'a bil'u ne.

N'a dun fôra mögo ma: temen an ka taa, o y'i nidungo sira bannen ye.

Musa sera ka min da o kan, o ye: «n bë Ala bolo, n te bolojugu kan». Nin don kerenkerennen in na, a y'a dòn ko tigi were bë Mali la, min t'ale ye. O tigi ye jow ye?

Fasojama: kalandenw, cikelaw, monnikelaw, baganmaralaw, baarakékaw, diine mögöw,

këjereyew ni mögo yeleke werew, kuma lasuranya la, fasokanubagan-ciw ceman n'a musoman ani fasoden minnu bë jamana kókan.

San 1991, marisikalo tile 26, de se ka jate Mali lakurayali baara damine ye min ñaniya jirala ñemögö kuraw fe n'o ye «CTSP» ni goférénaman mögöw ye, Liyetenan Koloneli Amadu Tumani TURE ye min ñemögö folo ye ani jamanakungi. Ñemögö kuraw y'a jira ko jamana te se ka jo jamanadenw ko.

Odekoñon, Mali ñemögöw y'a nini ka jekafö ni sigikakuma dō laben fanga forobayali kadara kono, n'o ñogonkunben bëweleko «Konferansi Nasionali».

O baaraw kera Mali faaba kono, n'o ye Bamako ye, k'a damine san 1991, zuluyekalo tile 29, ka t'a kuncé utikalo tile 12.

Dögökunfila baara in ye Mali soroké jekuluw ni dugubaw ni dugumisenw cikelaw jekuluw ni politikitön jekuluw ni baarakela jekuluw ni hadamade-nya jekuluw ni kalanden jekuluw ni jekulu yeleke werew jamana kono an'a kókan, olu bëe lajelen ka ciden yamaruyalenw dalaje Bamako.

O Fasojo baara senfe, a jirala bi-don ñemögöw fe, k'u haminankoba ye

min ye sisano ye fanga dili ye fasojama ma, min ka ciden 1300 ye ñogon sorohakililafalen in kene kan. Uko fanga latemenni fasojama ma, o korôte ko yeresago ke, k'a d'a kan Mali ye sariya jamana ye, min kono mögöw bëe dama ka kan. Sariya bë boli u bëe kan cogoya kelen na. U bë min jini fasodenw fe, o ye kumajogonya ni kotoñogontala ni yafanogonma nibaara mineli ni dusu ye.

An ka ñogon bonya ka ñogon son hakili la, k'an felaw jira ñogon na, walasa an ka se ka faso baara laadiriya ni sabali ni muju ni gasi-sigi ni yeredon hukumu kono.

«Konferansi Nasionali» jama kelen k'uka ñemögökulü sigi, k'o bonya di Amadu Tumani TURE ma, uy' utila-tila bolofara naani ye, minnu ka baaraw ñesinna jamana sinijesigi sira waga boli ma:

- Bolofara folo ka ketaw ñesinna wotekow bolodali sariyasében ma
- Bolofara filanan ñesinna pariti politikiw sigikan sariyasében jatemine ma.
- Bolofara sabanany'a hakilijakabo jamana taabolo sariyasében kan.
- Bolofara naaninan y'a fela jira jamana cogoya dantigeli kan.



ciklaw kumada dayelenna

K'a ta san 1991 Zuluyekalo tile 29 don na, n'o kera Konferansi Nasionali dayele don ye, ka na a bila san 1991 Utikalo tile 6 don na, baaraw kera komisonnaani kofolen ninnu de kono. Mogow tilalen ko komison naani ni njogonce, jamakulu dama daw sigira sen kan, ka wale kologirin daw laje, minnu tun kelen be bolokofefenweye Musa ka san 23 lajabafanga kono. O caya koson, min ka gelen n'a tow bee lajelen ye n'o ye cikelaw ka cogoya ye, an k'o laje njogon fe: Fanga fen o fen sigira Mali kono, k'a ta Modibo tile la, k'a bila Musa tile la, olu ma kungo-kono-mogow jate fen werew ye kunfinw ko. O siratige la, cikelaw kera faliya baarakelaw ye, ka duguba-kono-mogow ke kungo-kono-mogow ka baaraw tonodunbagaw ye. Bee b'o don, bee b'o kalama... Cikelaw, n'o ye senekelaw ye, ani monnikelaw ni baganmaralaw ni bolola baarakelaw ye, olu tun te wele dower la ko «burusi-kono-mogow» Hali mogo minnu ka baara ye burusi-kono-mogow bilasirali ye, kene yako, hadamadenyako, soroko, yiriwaliko ni nettaakow la, olu m'u mine fosi ye, u bonya t'u yoro, wa dogomaya ka ca ni wale nefo ye.

Kuma fila te da njogon kan ni perenni, dusumangoya ani nenini ma b'a la. A ka ca a la, n'u y'u hakilinataw jira fen min na, o jaabicogo jugu be kuma nege b'u la, cogoya la, min ka surun nimisa la, n'o laban kera makun ye. Makun koro te kodonbaliya ye, a koro te fugariya ye, a koro ye sirannya de ye, malo ne. Malo te kun horon na, a te ben segenbaatoma, a man di mogo kononafiliye.

KUNGO-KONO-MOGOW KA KONONAFILI

Mali senekelaw, a monnikelaw, a baganmaralaw n'a bololabaarakelaw, cew ni musow, olu tora «mankun» ni «yeremine» de la, minnu kuntaala janya kosebe. Cikelaw ye mogo konojelenw de ye. U b'u yere faga kojelen na. Nka n'i y'u negen, k'u file nalomaw ye, u be ban jira, n'a ma ke ni murutili ye. O de ye makun ni yeremine ye. N'u sera o hake la, kaban hali jine te se k'u wuli ka b'u kan kan.

Dije cikelaw bee ye kelen ye: u te dower don baara ko, a n'a bonya n'a karama n'a majigin. Kungo kono sigi ka gelen cogo o cogo, cikelaw te nebo duguba-kono-mogow fe. U b'a don ko «balo» ani «nafolo» minnu be



soroko dun dugubaw kono, k'olu de y'o sababu ye. O te digi u la. Min be digi u la, o y'u layelenni de ye jiri la, k'o jutige n'u ye. U b'o de wele ko janfa.


Fen kelen min be cikelaw tooro, k'u dusukasi, k'u kononafili k'u dabali ban, k'u bila nimisa ani mone kene, kan o y'u bilali de ye yerefaga baara la, ka tila k'u nalomaya min, k'u negen, k'u malasa, ka soroko k'i den, k'u ka baara nafa n'a tono bee k'i yere ta ye.

Kabini Musa Tarawele ka fanga sera nafolo niniko jugu n'a dunko jugu hake ma, a y'aka bolola mogow jense jamana kungo kono duguw bee kono. O kera sira bee kan, i ko hadamadenya sira, nafasoro sira, kene ya sira, balikukan sira, dugu yiriwatow sira n'u njogonnaw.

A kun tun ye ka cikelaw kamali njogon kan, ka kuma dumannin cejiw fo, ka yiriwali cogow dantige, ka lahidu lankolonw ta. Nka koro yere tun ye cikelaw bilali de ye faliya baara la, ka senefen caman soroko, walasa nafolo dunta ka bugun.

O koson, bonya kise kelen tun te Musa ka bolola mogow ni cikelaw ce. Mogow faamuyalenw tun don. Nka, u ka donniya ma se k'u bali ka

(a to be ne 6 la)



Mali Konferansi Nasional

cikelawtoor nisongoko la, k'u nangi tadowko la, k'u lajaba jiritigeko la, k'u dgooya tonsigiko la, k'u bila don o don kongo ni segen kene kan.

KUNGO-KONO-MOGOW KUMADA DAYELENNNA

Nka, a be fo ko mogow b'u ta la, Ala yere b'a ta la, ko sababu man dogo, ko don janya o janya, a sebal te. Ni fasojamakuluw tun ma Musa ka fanga bin san 1991 Marisikalo tile 26 don, ka Musa miné, Mali cikelaw tun be meen faliya baara la, Musa n'a nokan mogow tun te fa min tono dunnin na. Mali bee y'a don Iko Mariyamu tun te fa wari la; ko wari tun y'a taalan de ye; ko lafiya tun te Musa ye n'a ma wari nini k'a di Mariyamu ma. Wari dun soro cogow la, cikelaw ka senefenw lasaggonni de ka nogon n'a bee ye. O siratige la, fasojamakuluw ye forobafanga min sigi sen kan ko «CTSP», n'o Peresidanye, Amadu Tumani TURE ye, o ye fasoden numanw bee lajelenka kunben kene in laben, walasa bee k'i hakilinataw jira Mali taabolo cogo kura kan, sanko an ka jamana kana bila tugun mogo kelen doren ka bolo kan. Fasojamakuluw ka kunben kene in kera wasako ani nisondiyako ye, bawo, jamakulu kerenkerennen si gira sen kan, cikelaw doren ka cogoyaw nenaboli koson. A kera kunnawoloko ye, bawo, cikelaw caman yera kene kan. A kera lafiyako ye, bawo, cikelaw ka cidenw ye kuma ta, k'u ka cogoyaw nefs, kabini kunun, fo ka se sisan ma. A kera kuma dan ye.

Jamakulu bee lajelen dabali banna

nogon fe, bawo, mogowtun hakilit'a la ko fen be cikelaw kono, kabini tumajan. U ka folikan folobora o de kan, k'a jira ko fen tun b'u kono, kabini tumajan, ko Ala de tun m'a fowaati n'a foyoro latige folo.

O kuma kadara kono, senekelaw, monnikelaw, baganmaralaw ni bololabaarakelaw ka cidenw ye jamana nemogo kuraw ani fasojamakuluw mogow bee lajelen walenumandon, k'a jira k'a sine folo de ye nin ye kungo-kono-mogow ka wele, Bamako, nin kunben suguya in kene kan.

Tine yere la, kabini Malikera Mali ye, nin nogon kunben ma ke. O b'a jira ko jamana nemogo korow tun be jamana mara cogo min ka di u ye, mogo te nininka, a te kun mogo yere la ki milinata lo, k'a dakan, Musa Tarawele y'a jira k'a le ye fanga la, a m'a sara mogo la, wa k'a be jamana boloda cogo min ka di a ye.

Nin kuma suguya mana fohoronye, a ka c'a la, a be taasi k'a ka kumaw foyorow jate miné, k'a ka walew keyorow latomo, walasa k'a kisi lajaba ma.

Musa ka fanga binna ka Malidenw to yere miné hukumu de kono. Jamana kono an'a kókan, bee sera i da la. O y'a jira Musa la, ko bee be siran a ne. Siran tun te. Tigensonya de tun don. Sisan, kuma labilala bee ye. O de koson, kunben in kene kan, cikelaw y'u haminankow jira: olu de ye sorokelaw ye, olu de ka kan ka miné kojuman, k'u ka segen sara kojuman; k'u deme sira bee kan, walasa, min kera Musatile la, o nogon

kana ke tugun.

Cikelaw ka kumalaselaw y'a jira, u ka kuma kunce tuma, k'u bëna ko bee ke, ka jekulu dòw sigi sen kan, seneko, monniko, baganmarako ni bololabaarako bolodacogo koson, walasa duguba-kono-mogo si kana ferè kungo-kono-mogo si ma tugun. Konferansi Nasional jamakulu bee lajelen sonna cikelaw ka yere laben wale kofolen ninnu ma. O b'a jira k'u nali ma ke gansan ye, Bamako kunben kene kan.

A kera cogo o cogo, cikelaw wasalen bora Mali Fasojamakuluw ka mogo yamarualenw ka kunben kene kan. O misali kera u bisimilali ye Peresidan Amadu Tumani TURE yere fe ani Sumana SAKO, n'o ye Goferenaman kuntigi ye.


Jekulu kerenkerennenw sigira wale were minnu kan, cikelaw haminkow kofe, n'olu fana ka kan, ka bila bolo nenama kan, olu dòw file nin ye:

MALI JAMANA KORONFE KELE DABILABALI

Kabini Mali y'a yere ta, fognogonko donna Malikorone mogow ni nogon ce, n'o ye Burudamew, Surakaw, Koroborow, Belaw, Fulaw, Bamanaw ani Marakaw n'a tow bee lajelen ye. Nogonfaga anibinkanni ni tijeli suguya bee kera. A kele jenseenna, ka jamana dugu caman werew lasoro.

A jirala konferansi kene kan ko ni bancogo ma nini koronfe kele in na, ko Mali kono mogow te lafiya; ko ni lafiya ma ke, jamana ka kele-

haminanko werew



nya n'a ka yiriwalikow te na se ka sira soro. A jirala konferansi kene kan ko ni bancogo ma jini koronfe kele in na, ko Mali kono mogow te lafiya; ko ni lafiya ma ke, jamana ka kelenya n'a ka yiriwalikow tena se ka sira soro.

Jekulu min sugandira keleko in kama, o y'a kanu ko jekasigi do ka laben san 1991 nowanburukalo la, Tumutu min bema koronfe mogow kacidenyamaruyalenw bee lamen, k'u n'u hakiliw jira nognon na, walasa jamana kelen wolodenw ka fara nognfaga ma, ka here ni lafiya ke Mali kono.

FAGALI NI NAFOLODUN YE BEE LAMURUTI

Jekulu do sigira sen kan Musa Tarawele n'a muso n'u nokanmogow, siwilikunda ani sorodasikunda, olu ka dantemen walew lajeli koso. Fagali minnu kera san 1991 kalo saba folo kono n'olu kera Musa ka fanga binni sababu ye ani nafolo dunko jugu min kera Musa ka san 23 jahadi fanga kono, olu ye Mali bee dusukasi, k'a bee lamuruti.

O de koso konferansi y'a jira ko Musa n'a ka mogow, minnu minera folo ani mineri ka kan, ka se minnu

ma, k'u bee lajelen be latemen sariya ka bolo kan. N'o kera, u ka kiri be tige a cogo la, k'u jangi cogoya la, min hake n'u ka tineiw hake bee ye kelen ye.

Ajirala ko sariyasob'a ka baara la, ko ni jaabi minnu bora segesegeliw la, k'o kiritige be ke, jamanadenw bee jena. A kera cogo o cogo, bee sigilen be ka Musa n'a ka bololamogow jangi don makonon.

MALI KALANDEN KOROBAW KA BAARA SORO GELEYA

A be san wooro bo jinan, Mali kalanden koroba sebentigw te ta foroba-baara la tugun. Musa Tarawele ko jamana fanga te se k'olu sara, ka fara baarakela tow kan, minnu yerew te ka sara, a cogo la, bawo, baarakelaw tun be sara sine saba wali naani san kelen kono.

Kalanden koroba minnu ka sebenw b'u bolo, n'o b'a jira k'u bee se ka baara ke, kalanw bee bannen ko, o jate minera, k'o ke mogo baatan ni ko hake. Olu bee musakaw b'u somogow de kan sisan. Denmisen ninnu ka baara soro geleyali koso, Konferansi ye feere dow jate mine, fangaso ni kejereyew hake la, minnu bema ke sababu ye, ka baarada suguya caman dayele, kalanden kofolen ninnu doron kama.

TUNGARANKEW JATELI MALI DEN DOW YE

Maliden taamala ka ca. Maliden te sigi. Maliden be sorodijie jamana bee kono. Maliden bokun ka ca. Fenjininaw ni jagokelaw de ka ca ni tow ye, in'a fo forobabaarakelaw ani politiki mogow, minnu miirinataw ni

fangaso miirinataw te kelen ye. A kera cogo o cogo, fangaso kelen si m'a mago don Mali tungarankew la. Olu tora u yere bolo. U bee y'u sigi cogow jenini jamanaw werew kono, k'u yfrelaben, n'a ma ke ni Mali nemogow ka deme ye. O kera sababu ye, dow k'u ka nafolo sorolenw kunsin jamana werew ma, ka soro Mali min y'u faso ye, o be segen suguya bee la.

Walasa tungarankew k'u yere jate fasodenw ye, Konferansi y'u niyoro sigi, bonya ni karama la.

A jirala ko Minisiriso min dayele la, u haminankow jenaboli kama, k'o k'icesiri, cogo bee la, k'a jira tungarankew la, k'u ye Maliden lakikaw deye, k'o siratige la, Malikunkanko kelen si man kan ka fu ko tugun.

KUNNAWOLO KONFERANSI

Mali Konferansi Nasionali kuncera wasa, nisondiya ani kunnawolokan, bawo, jamana werew kono, farafina, dow ka Konferansi ma ne balawu ko. O b'a jira ko Mali kono, fajamakulu minnu jera ka Musa mine, k'olu bennen be, k'u be jamana nemogo kuraw lamen, ko foroba fangako ye tine ye, ko Mali jamana te se ka bila mogo kelen doron ka bolo kan tugun!

Kuma lasurunya la, a be se ka fo ko mogo kelen fanga banna Mali kono ni Musa ka fanga binni ye, ko Mali jamana maracogo, a bolodacogo, a yiriwacogo n'a ka netaa walew sariya kuraw tara Konferansi Nasionali in senfe, soroda bee lajelen ka mogo yamaruyalenw tun be min kene kan.

B. TURE ni A.G. KANTE.

Mali Konferansi Nasionali kera "danmako" ye Afiriki kono

Dow ko k'a te ke. Dow ko k'a be ke fo k'a ne. Dow ko n'a kera k'a te kunce here la, k'a laban be ke balawu ye, i k'a kera Afiriki jamana caman kono cogo min na.

O jamana dow Konferansi ma se ka ke halisa benbaliya koso. Dow ta kera kele banbali ye. Dow ta kera kalo kelen wali kalo filia kono an'a nafolo camanbo, nafolo min ka ca ni sefa wari miliyari fila ye.

Bee y'i ta fo, numanna ani jugumanna. Bee y'i ta ke numanna ani jugumanna.

Nka, Ala y'a ke, ka Malidenw wasa, minnu jera ja Musa ka fanga bilen tasuma faga nogon fe, san 1991 Marisikalo tile 26 don.

Mali Konferansi Nasionali kera «danmako» ye

Afiriki kono. A ma temen tile 15 kofolen kan. Soroda bee lajelen ka mogo yamaruyalen tun b'a kene kan.

Jatamine la, mogo hake benna 1300 ma, ka bo jamana kono an'a kokan. A nafolo bolen fana ma temen Sefa wari miliyon 300 hake kan. Woyo bora a la, nk'a ma ke kele ye. A kera ben ni wasa ani kelenya ye fasojamakuluw bolo.

A kera kunnawolo ye jamana nemogow bolo. A kera kunkorota ye Amadu Tumani TURE bolo n'o ye "CTSP" Peresidan ni Mali jamana fangaso kuntigi ye ani Sumana SAKO, n'o ye Mali Goferenaman kuntigi ye, Mali kura be ka basigi olu fila minnu ka forobafanga hukumu kono.

